

四庫全書

集部

欽定四庫全書

鄱陽五家集卷十四

鄱陽史簡編

明劉炳春雨軒集三

長短句

題賈文彬耕樂堂

前年戊醺口關去年來利陽鎮花陰卧犬喜官閒沙際
飯牛饒野興江村寒食落花初水滿平田宿雨餘凝塵

懶拂雕翎箭
負耒歸來夜讀書

題崑崙雪曉圖

自有宇宙便有此山六丁智力憚疏鑿
一氣神秀鍾巔岼九龍上蟠日月麗
六鰲下鎮滄溟寒西母雙鳬遠莫至
周王八駿邀難攀萬仞皚皚太古雪
大明中開爛銀闕玉京瑤圃恍瀛洲
一洗胸中煩惱熱自非砥柱障狂瀾
天地蒼生混魚鱉摩挲此圖
雙眼開今我胸次生崔嵬
安於磐石奠四海長歌萬里天風來

題李陵蘇武泣別圖

臣有千古哀覆水一去難再回臣有三寸舌染絲一黑
難再白丈夫瓦裂聲名虧漢不我得將安為吞聲長哀
送蘇武忠肝惟有青天知烟沙蕭條壓冰雪心事淒涼
淚成血誰憐魂魄老邊塵空有丹心瞻漢闕目斷關河
夕照迷茂陵烟樹草萋萋將身不似雲邊雁猶得年年
故國歸

雲湖漁樂圖為陳茂叔賦

船頭書百冊船尾酒百壺懶騎桃花馬濯纓雲水湖手

攜珊瑚竿不掛朱虎符壯心捲笠澤浩氣凌東吳寒食
春風三月暮暖帳桃花香簇簇弱水三千錦帳紅禹門
九萬晴濤綠身被紫團宮錦袍靈槎不厭銀河遙絲綸
垂虹八百丈坐弄明月吹鸞簫罡風泠泠挽雙袖手捫
箕尾聞雲璈醉來晞髮支機石鼓枻天津釣六鰲

漢之季哀故御史余公闕守舒城死節而作

漢之季洪流何湯湯赤子為龍蛇蔓于漢以淮割我城
邑圖不祥天子曰嘻予何以奉宗廟朝羣臣登明堂曰

予近臣御史闕咨爾撫師古舒國聞以外爾制之賜爾
三百衛士斧與節毋黷民毋究刑苟附而安文武並用
禮之經臣闕昧死頓首泣主憂臣辱敢不力御史騎馬
來萬姓淚落喜且悲子我塗炭民漢官威儀今見之東
市牽牛羊西市羅酒漿紛紛列道左御史下馬相扶將
諭以天子聖且愛明見萬里外宵旰不遑食兵爾飢爾
苦顛沛御史雖愚頗知忠與慈惟爾患難相扶持鼓爾
鼓旗爾旗疾則疾徐則徐壯者戰守老者居俾爾農桑

母奪時桑青青麥茫茫牛羊走丘墟御史城上行茅屋
人家聞讀書以心感人心敵至輒敗不敢窺城東啼虎
豹城西嘯熊羆斬黃攻始退山越什什伍伍來相圍裹
瘡戰城南吮血戰城北大船小船捍江列嗟城中如流
魚御史奮臂城上呼悲風揚塵沙起白日無光士爭死
廩無粟士氣衰朝食城上草暮煮城下葦癘疫相
枕何流離御史斬愛馬士卒不忍食日久援不來
矢盡兵殘益危逼梟騎死野戰烏鳶銜肉流尸殪

孤城坐殄瘁土地道不可當御史誠不德握手
謝父老爾民多殺傷御史登城北面拜稱臣萬死
無以報陛下闔室竟與城俱亡楚山蒼蒼楚水洋
洋御史之節功烈顯彰天之奎壁地之河嶽人之
綱常千載弗渝日月普光誰能置廟復立社享爾
祀爾百世及天下

秦淮書舍為端孝思賦

秦淮水金溶溶羣峯迤邐以走北萬壑曲折而朝東盤

礪之秀山川所鍾金精伏地斗牛爛王氣燭夜風雲從
以之定九鼎制萬國鳳凰鵲觀之壯龍蟠虎踞之雄春
風三月城東路紫陌紅塵映朱戶萬樹嬌花駿馬嘶千
條弱柳流鶯度楚榭春粧玉襯鈿秦樓夜宴金搖步鬢
鬢秋痕曉霧輕眉分晚黛朝雲妬洛下誰論杜牧狂臨
邛不數相如賦故人結屋對江波厭聽朝朝玉樹歌白
紵裁成朝隱几黃庭寫罷晚觀鵝芸窻文史三冬足日
閱牙籤常百軸志篤孫康映雪勤心潛車屑囊螢讀舌

捲波濤隘五湖氣雄島嶼吞三蜀南金赤箭如圭
如璋泰山北斗景星鳳凰有志未可量也期爾萬
里風雲翔

墨池謠簡錢本初

夫書未可易言也鳥跡蠆尾蝌蚪出焉天雨粟而鬼魅
泣河圖出而龍馬傳八卦畫而結繩解三才著而文明
宣漆書汗簡去古益剝落魯魚亥豕讀者窮磨研湯銘
商鼎彷彿歟識在秦封石鼓但見鎖鈕連六經多舛誤

去聖逾千年蒼頡莫可考史籍何茫然李斯陳邈更古
制篆隸分草如雲烟王次仲氏作楷法趨時簡易隨方
圓蔡邕夢神授八法鍾梁張李尤精專中間作者不可
數大令小令聲名絕今古何天經地緯而山峙川融亦
玉振金聲而龍翔鳳翥草字貴尊嚴真字貴風度大字
貴結密小字貴寬裕樂毅論太史箴筆力殊正直嚴嚴
乎忠臣烈士之心告誓文曹娥碑其容何莊敬肅肅乎
孝子順孫之儀孤雁賦逍遙篇興趣託高遠出塵拔俗

何翩翩洛神賦畫像贊安儀特閒雅恭肅莊矜誰敢犯
是皆見義以成文非獨擅場而觴濫歐虞褚薛柳與顏
方駕並軌何桓桓米蔡蘇黃尚嫵媚趙松雪公真傑立
大書特書勒金石清苦平生非一日崑山春早鳳雛鳴
溟渤霜寒海青出前輩落落如晨星慨古閉門芳草生
年來此事知者少隱几看雲數歸鳥庭樹迎秋落葉涼
墨池經雨蒼苔繞錢郎一年相別多過我顏色如春和
臨池刀筆如豹變滿紙墨汁翻鯨波燕子日長休懶惰

莫向清風北窻卧有鳥不鳴一鳴驚人
有鳥不蜚一蜚冲天後生可畏未可量也
一羽雲霄期勉旃

明妃曲

胭脂馬雕鷹旗狐裘蒙茸金絡羈白玉作鞭雙袖垂手
抱琵琶紅淚滋黛雲半顰顏如玉春嬌學得蛾眉綠自
擬將身寵漢宮誰知薄命離鄉國窮陰絕漠易悲辛落
日哀笳處處聞嚴霜夜鎖關頭月朔氣寒飛磧裏雲鴻
雁蔽天斜作字駱駝連塞動成羣漢家君臣亦良苦却

將紅粉為禦侮廟堂肉食列重裋汗簡如何照今古妾
身分得君王憂萬死沙塵心亦休腸斷年年邊地夢心
懸日日漢宮愁百年一身何足道妾容不似花容好漢
家三十六宮春傾國傾城更有人君王故殺毛延壽特
遣單于貴妾身

河中之水歌寄劉子雍程伯羽同賦

河之水向東北洛陽女兒好顏色八歲畫蛾眉九歲自
裁衣十歲學識字十一拋梭攀錦機十二刺繡紋十三

能賭棋十四彈篴篥十五纔上頭髻偏斜戴金團鳳臂
弱不勝珠絡鞦羅幃睡起傷春瘦畫閣粧成對日羞十
六妖嬈解歌舞容色比花花不語堆堆生怕下階行三
寸春嬌雲一縷行媒將聘周家郎桂柱蘭堂錦作房比
翼鏡奩粧玳瑁合歡裙帶繡鴛鴦茱萸露濕珊瑚枕蘇
合香熏翡翠牀生憎啼鳥催春去不忿啼鳥怨夜長杯
成連理生何幸釵合同心死不忘眼前節物年年度只
恐芳華不相顧南陌芙蓉午夜霜東園桃李三春雨君

當為妾秉燭遊東海為缸槽作邱妾當為君金縷謳春
風莫遣人間愁

董嬌嬈為周郁賦

妾家住邯鄲少小矜容顏七歲畫蛾眉十歲垂髻鬟十
三刺繡人前坐十五秦箏架上彈紅粉樓高臨大路自
恃芳年立門戶鸚鵡春眠芍藥闌驕驄晚繫垂楊樹梅
點香奩玉作鈿蓮移羅襪金為步朝歌暮飲綺羅叢東
園桃李鬪春風黛疑柳淺朝勻翠朱訝櫻濃曉洗紅燭

圍錦帳宵常曙香謁雕籠夕未空秋月春花等閒度誰
憐窈窕近新故夜夜虛迷洛浦雲朝朝枉結陽臺雨帶
綰同心只自憐枕期連理翻成誤眼前相愛豈相知彈
指風光節物移只道青春鎮長好那知白髮易如絲容
顏銷歇鶯花冷歌舞悽涼鞍馬稀昨日樽前雙淚落誰
似周郎情不薄得配鴛鴦死亦判願諧魚水生相托青
鳥緘封書莫遲秦樓腸斷夜烏啼君卿豈羨東牆約梁
氏應同舉案齊

璚姬墓宋仲珩同賦

野花凝粉鈿瓊姬醉時面夕露柳絲長璚姬晚黛粧行人墳上莫回首一顧春風一斷腸

來日苦短黃子邕同賦

二首

來日苦短去日苦長人生如朝露不如笑歌置酒臨高堂春風不到九泉下盛年一去難再芳老行及之徒悲傷

來日苦短去日苦催人生如朝露不如笑歌置酒臨高

臺舊時歌舞今已矣章華百尺連青苔老行及之徒悲
哀

行路難

奉君五彩鳳凰之綺幄七寶鴛鴦之錦牀博山氤氲之
水屑金盤沆瀣之瓊漿春風無情不相待朱顏綠鬢年
年改姑蘇臺上鼓如雷四時歌舞百花開當年意氣今
安在鬼火如燈秋似海

樂府

箕山操

堯讓天下於巢父巢父曰君之牧天下猶予之牧
犢吾無用天下為莊子有樊仲父牽牛飲水見巢
父洗耳驅牛而還恥令牛飲其下流也

清流泱泱箕山之陽樛木森森箕山之陰嗟嗟巢父豈
洗其耳實結其心

崩城操

杞良妻杞殖妻妹朝日之所作也殖戰死妻哭而

城崩遂投淄水死其妹悲之

朝從城上哭長城與雲齊暮從城上哭長城化為泥嗚呼城已崩兮猶可築夫君死兮身可贖妾寧化魚淄水窟立廟祀君君血食

石婦操

即望夫石也悲其夫之不還也

朝朝山頭望日日願夫歸夫君不歸將疇依妾身已一難再失寧向山頭化為石山崩石應墮江水千年萬年

清到底

前旌操

衛後母子壽母欲殺前母子伋而立壽使伋乘舟
將沉而殺之壽知之與伋同載舟不得沉又使伋
之齊令寇見載旌者殺之壽又竊旌前行盜見殺
之伋載壽屍還亦死

同舟幸濟兮予豈無咎前旌喪原兮盜莫之究仰叩天
兮青青俯呼地兮冥冥爾迫我死兮竟沒身於無罪予

敢愛生兮致淑德於無旌嗚呼兮已輿尸於故國誓甘
執鞭兮九京

殘形操

曾子夢見一狸不見其首作

夢生於觸兮狸偶異形吉凶有定兮夢胡足憑嗟嗟巫
咸兮不疑何徵

履霜操

尹吉甫子伯奇無罪為後母所讒見逐集荷為衣

採梔花以為食作歌投河而死

嗟讒言之構兮父豈無知父將不聞兮母心則離朝履
霜兮夕採梔食撫二弟兮惟順弗違嗟嗟蒼天兮父母
孔安兒兮兒兮死奚以悲

桑中操

魯秋胡仕陳歸見採桑婦悅之以金婦不從及歸
見母母呼妻出識之醜其夫行遂投沂水死之

秋胡歸陳息桑陰兮見彼美姝悅以金兮重色忘親

何荒淫兮嗟彼丈夫無忸心兮婦以義決誠千載之箴
兮

精衛操

炎帝女溺死滄海化為精衛日銜西山木石以填
怨溺死也

海石白凝雪海波清照天銜石填海無窮年但願滄海
揚塵化為土爾無冤兮爾無苦

五雜組四首

五雜組架上衣往復還庭下雞不獲已炊戾戾
五雜組雲錦裳往復還雙鴛鴦不獲已守空房
五雜組牀上裯往復還橋邊人不獲已行負薪
五雜組織翠裾往復還溪中魚不獲已身當墟

同雲

同雲四翳霖雨其滂虎嘯谷風鳳鳴朝陽呂望歸周尹
摯佐湯仲父齊霸諸葛漢昌氣以類感道由義彰功濟
九有千載之光

邕熹

聖人務德蠲煩去苛既舞十羽載奏雲和八表雍
雍含哺而歌彩霽鈎陳景融羲娥崑崙無塵渤海
不波

烏栖曲

烏夜啼梧桐樹愁夢回腸應苦蘭膏張照樹光啼烏去
夜未央梧桐葉底清露墜一聲一滴相思淚

飛龍篇

扶桑戢彩崦嵫匿輝六轡既逸長戈莫揮盛年不重歲
當以欸蘇秦未遇妻織機百里去家炊爨屢栖栖燕與
雀安知鴻鵠悲

紫騮馬寄朱士止

士止文公四世孫

紫騮馬雕鞍鞵來汙如赭恨郎騎馬過章臺醉月眠花
尋不來郎若歸時將馬賣無馬尋春郎莫怪

上之回

上之回紫闕拂曙紅雲開蛟龍懸旌麗曉日駱駝駕鼓

鳴春雷前勾陳後玄武鳳凰來儀百獸舞左黃鉞右白旄萬國稽首諸侯朝玉帛如山不可計天子之壽四萬八千歲

劉生

健兒如馬駒墮地便有千里足平生忠與孝拳拳惟佩服烈女不自媒美玉原韞匱豈無匡濟心四海作霖雨命左與時違長嘯還鄉自廬墓

邯鄲行

白日下叢臺野曠秋風早不聞歌吹聲空遺往來道傷
心却憶平原君墓上牛羊踏荒草

寒夜怨

月來愁亦來心憐月去愁應改樓高月轉遲停箏坐倚
熏籠待月落却成眠誰知枕冷愁仍在

陌上車

大車聲隆隆小車鳴碌碌朝從車下飯暮向車上宿車
輪濺淤泥漬我身上衣汚衣再洗何足愛慈母縫時淚

痕在

折楊柳

折楊柳折得楊柳多愁心將奈何自君征戍莫可道一
雙蛾眉不曾掃歡愛長從夢裏逢容華坐向春邊老楊
柳折殘春又生白髮東風無世情

賦

歌風臺賦

岱嶽截雲黃河觸雷豐沛曼衍青徐縈迴數仞崩劣九

層崔嵬危基立壁疊砌欲摧雨剝沙石烟悽莓苔野樹
銷沉陰雲晝霾征馬過之振鬣而躑躅飛鳥欲度斂翼
而悲哀顧父老而問曰茲所謂漢高皇湯沐之邑歌風
之遺臺也耶想夫坑灰未冷漆烟尚凝使者獻璧滹池
告靈沙邱之輜車未啓四海之鮑魚煽腥望夷鹿失草
澤蛇驚西郊之鬼母屢泣芒碭之龍氣已成爾其寶劍始
握赤幟一麾龍吟而風雲奮激虎嘯而草木披靡陳涉
感鴻鵠之歎張耳動燕雀之悲燕趙廟壘齊魏偃旗于

以率三軍之衆于以陳九伐之師拯生民於水火蘇大
旱於虹霓迨夫關輔前驅函谷旣闢轟雷隱聲長雲列
戟殺氣填空腥烟簸礫劍光迸星麾幢蔽日熊羆震駭
虎豹悸慄一戰而土崩瓦解再戰而揚沙走石天地為
之低昂川海為之蕩瀾及夫董翳授首章邯失律諸侯
主臣俯伏喘息山東豪傑知入關之先子嬰繫頸降軹
道之側所謂百二全秦之山河黯其無色矣想夫隆準
龍顏豁達大度扶義而西莫不景附囊括圖書封籍府

庫玉帛無所取子女無所顧示三章之約法動萬民之
鼓舞化呻吟於謳歌同赤子於慈母慨相見之何晚恐
延留之不固亞父所謂貪財好色者今日之壯志非細
故也想夫項王喑啞萬人皆廢方其入關莫敢仰視一
舉咸陽三月之火益重金刀九鼎之勢及漢軍於灞上
宴鴻門於兒戲將軍有意於督責敢不逡巡而辟易等
餽肉於虎口同垂食於魚餌張良獻玉斗以請成亞父
示寶玦而肆志衝冠已見於怒髮斗酒何辭於生彘繫

成敗於毫縷賭天地於一擲嗟夫垓下之歌騅乎不逝
徒喑鳴增蓋世之雄知忠厚有回天之力固韓彭之告
功亦蕭曹之成計也及其羣雄既削四夷日寧定都宏
宮室之制推功誓帶礪之盟論三傑有股肱之効致四
皓有羽翼之成想其寬而愛人雄吞八荒已化家而為
國念桑梓之莫忘六轡既啓八鸞載將黃屋前設紫蓋
後張翠華耀虹霓之彩金鉞晃日月之光千羽舞于兩
階旌節列于五方千官景從萬騎騰驤馳道塵清於草

色輦路雨霽而春芳駕鼓車於索馳奏簫韶于鳳凰宮
仗璀璨仙班琳瑯爰止舊都旋歸故鄉萬姓高呼里閭
輝煌父老歡騰而謳歌兒童駿奔於壺漿會故人而置
酒因起舞而增傷登高翹首指顧褰裳悲壯慷慨感昔
徬徨須千秋而萬歲終魂魄之來翔威已加於四海德
咸被于萬邦慨猛士之何在思守成于四方瞻雲氣之
昭回歌大風之飛揚思示儆於來裔關制作於非常迺
命太史協吉呈祥高山是甸因阜為岡厥土燥剛厥位

而陽既經且營爰度而量繚版幹之轟轟勤畚築之鏜鏜萬杵既殷百庸克襄咸鳩工而畢事爭輸力而踉蹌何經始之不日宜庶民之交相也嗟乎姑蘇壯麗銅雀迤邐構炫日之雕題貯如雲之歌妓奏午夜之歌鐘艷三春之羅綺恣聲色于荒淫塗生民於膏髓終麋鹿之來游亘後世其誰齒孰若我皇海宇一匡安不忘危內修外攘仁以為紀義以為綱禮以為隄智以為防卷抔土奠乎九域屹八柱表乎中央所以成漢家四百年太

平之基業垂鴻猷于萬代而無疆也

脩竹賦寄胡梅屋

翳綠竹兮修修羅生兮庭之幽體匪草兮匪木質克剛
兮克柔非分幹兮淇園之澳必濯根兮渭川之流爰貞
心兮自守故堅節兮獨道凌霜雪兮素操不改假雲烟
兮繁陰愈稠豈競芳兮桃李欲干勢兮斗牛清韻兮戛
玉寒光兮翠浮動西風兮三徑夜雨淡明月兮空庭暮
秋其清也巢由兮未擬其直也史魚兮莫儔其虛也願

回兮屢空於陋巷之下具糶也夷齊兮不食于首陽之
阪亦託跡兮將謂曾結知兮王猷唐六逸兮是隱晉七
賢兮寔游或述典謨兮傳簡於翰墨或托宗廟兮列籩
於庶羞或同勳兮桑弧或協律兮鳴球宜比德兮君子
終化龍兮莫可留也極遐思兮仙子終參鸞兮莫可求
也辭曰君山暮兮湘雲飛洞庭波兮春離離吹參差兮
增我悲洞庭波兮湘水深竹上之淚兮秋陰陰歌滄浪
兮傷我心

荊門賦

君山秋兮蒼蒼洞庭寒兮欲霜雪流碧兮潦盡水殞黃
兮菊芳白雁銜蘆七澤凍玄猿號風三峽長客有佩明
月之琳琅繫鳳凰而翱翔纓茜飄兮絳綵劍蓮吐兮雪
芒思攬轡於昭邱爰弭節於荊陽顧漢水之為池瞰方
城之為隍據軫翼之躔次占熊繹之封疆沅沱既導朝
宗于王厥土惟泥黍稷穰穰馳馬被野牛羊彌岡纁組
燦爛金玉鏗鏘菁茅筓輅枕枯豫章鴻雁鳬鷺鵠鶴鶩



鶴砂丹石翠椒紅橘黃玄獐大龜赤鯉青魴羽毛齒革
物產之良實富國強兵之所利宜併吞割據之相攘也
嗟乎維昔漢網解紐炎靈中微旄頭夜蝕天狼晝垂赤
刀鳴于武庫白魚雨于京畿洪流板蕩黨議橫馳奸臣
竊命太阿倒持曹瞞挾翠華以遷許董卓積黃金而築
郿六鰲揚塵於紫渤九龍失水於瑤池志士懷攬轡澄
清之慨勤王動枕戈興復之思通人俯仰于形勝未嘗
不痛恨於桓靈之陵夷也東望夏口蔚乎武昌鵠鵲之

觀抗神宮于雙闕黃鶴之樓凌雉堞于中央鸚鵡芳洲
帶草色漢陽野樹迷烟光赤壁懷其烏林浙瀝憶樓舫
之如林想旌旗之蔽日敷動地之征聲列連雲之戰戟
妖氛引于宛洛殺氣纏于郡邑火星晝騰烟砲夜擊檣
連烽燧岸走沙礫龍虎決于雌雄成敗等於呼吸謀興
輔王業於萬金何土崩瓦解于瞬息孫策周瑜之成美
曹操張遼之失計事竟敗于驕矜身幸免于倉卒致當
時之扼腕重來者之歎息故壘蕭條斷壕周遭江屯崩

雲端乎怒濤楊柳嘖春於別渚蘆花慘雪于殘潮寄登
眺于草木付歌嘯于漁樵夢明月于白鶴弄春風于紫
簫往矣醜酒臨江之槩傷其橫槩賦詩之豪所謂東風
不與周郎便銅雀春深鎖二橋者乎南望則岳陽之區
雲夢之墟包經潭沔煦浮太虛衡嶽嶙峋朱陵氤氲娥
皇遺廟粉鈿消香於春色蒼梧故隧漆燈澄彩於秋塵
玉鸞斜於寶鑑金雁浮於海銀長沙之津瀟湘之垠鳴
夜雨於斑竹捲西風於白蘋困遷謫之賈誼悵行吟之

靈均忠貞之諫弗任泣涕之書徒陳天衢騁于駑駘草
澤閱于麒麟楚人致懷沙之恨漢文空宣室之勤所謂
可憐夜半虛前席不問蒼生問鬼神者乎西望則白帝
挿漢烏道際雲灩澦霜拂峨嵋黛勾龍湫虎牙尾閭吼
白鹽赤甲虞淵昏天府沃壤于以定霸而制國鑄山煮
海于以濟世而安民啓中山之帝胄申太義而奮身結
關張之英姿同魚水於君臣起躬耕之高卧枉三顧之
殷勤義旗渡于瀘水耕者雜于渭濱運木牛與流馬布

八陣於鼎分誓鞠躬于盡瘁痛嘔血之酸辛墮大星于
前第傷漢祚之遭迤所謂出師未捷身先死長使英雄
淚滿巾者乎北望則襄陽縈迴峴首崔嵬汝穎曼衍唐
鄧宏開沙湮檀溪之浦棘覆龍山之臺孟嘉芳躅帽落
斜陽于杞菊龐公高隱徑迷斷靄之蒿萊高陽之酒徒
零落習池之歌舞誰來更無金鞍換小妾寧復銅鞮
歌落梅紅剝鷓鴣杓翠消鸚鵡杯淚亦不能為之墮心
亦不能為之哀所謂晉朝羊公一片石龜龍剝落生莓

苔者乎吁嘻兮風景不殊山河如昔慨戰馬之何在消
風雲于倏忽何三國之英傑逞干戈于智力措蒼生于
魚肉不能安一日于衽席爭腐鼠于飢烏致羊藩而膾
噬徒區區于井蛙莫能混南北而為一豈天運之有常
抑非人力之所能致者乎偉哉我皇龍奔虎驤雄劍一
呼囊括八荒大明中麗日月普光四夷八蠻析津扶桑
莫敢不屈膝莫敢不來降干羽舞而率百獸蕭韶奏而
來鳳凰制國定都分茅建邦衍金枝于玉葉頒寶牒于

天潢紀綱永世本固支強玉璽金券鸞輿煌煌昭圭璋
于袞冕畫粉藻于衣裳地控上游履畫荆襄以定社稷
以開明堂宮殿麗于九土旌節衛于五方壯軍容于萬
里觀玉帛于梯航圖書之府奎壁之章卧金甲於綠沉
包虎皮于弢囊仁以為紀義以為綱帶礪之盟永茂永
昌小臣獻賦祈萬歲而躋于虞唐也

南詞

重游三山感舊

虞美人

信陵門下簪纓客，寂寞頭都白。
重來無復舊交遊，上馬臺邊烟草不勝秋。
風流雲散繁華去，猶指將軍樹長歌。
何處弔荒邱，衰淚淒涼不盡與江流。

汴梁懷古壬辰年作

虞美人

春風芳草梁園路，玉輦今何處。
香銷珠翠舊粧樓，惟有胭脂井畔水東流。
傷心太液池頭月，清影圓還缺。
萬年枝上野花開，腸斷年年不見翠華來。

送別

憶秦娥

溪頭柳青青折贈行人手行人手最傷心處西風重九
陽關一曲長亭酒停鞭欲去仍回首仍回首少年離
別老來依舊

題御溝紅葉

水龍吟

御溝暖透溫泉柳容不覺西風早紅葉飛來珠簾搭處
始知秋老訊步瑤階雁沙香褪襪羅嬌小謾宮袖微揜
玉纖輕恰臘脂濕露華清曉寶硯香薰煤麝拭霜毫
龍蛇縈繞芳題錦字翠頰紅怨帶真連草天上人間為

憑流水春心多少謾殷勤寄去無情有恨綵雲青鳥

春晚
卜算子

簾幙棟花寒啼鴂催春去芳草天涯綠漸迷烟樹無重
數老驥頓長纓猶憶雲霄路流水孤村獨掩門白髮
東風暮

寒食
浪淘沙

野徑土墻斜桃李桑麻紙錢飛處亂啼鴂祭餘攜酒去
寒食野人家
苑樹憶天涯遺恨琵琶銅駝衰草卧龍

沙漢寢唐陵無麥飯暮雨梨花

惜春

浪淘沙

年少為花愁珠箔青樓竹西歌吹古揚州翠袖舞低楊
柳月醉倒還留投老憶狂游往事都休繁華如夢水
東流飛絮落花春去也白了人頭

寄水北山人徐宗周

滿江紅

水北幽居抱柴門一溪寒玉山萬疊青林當戶白雲連
谷乳燕落紅春又晚柴桑三徑多松菊喜新晴布穀又

催耕秧分綠 牀頭酒何時熟
謀諸婦明朝漉謾黃雞
炊黍共邀鄰曲舊夢風雲銷
俠氣繁華看破知榮辱繫
扁舟罷釣晚歸來書還讀

辛酉九日

木蘭花慢

寫長空一雁又景物是重陽甚雨暗東籬數枝青
盡未放秋香攢筇倦登高處掩柴門衰柳映橫塘
日暮江聲哀哀西風鬢影蒼蒼
當年歌舞翠紅鄉一曲杜韋娘
曾擊碎珊瑚玉人扶醉銀燭成行
回頭已成陳迹早歸

來茅屋石田荒謾把清樽遣興都非少日疎狂

蕪城懷古

春草碧

平山堂下東風何處海棠春瓊花月橋上十里珠簾金
釵翠袖歌聲徹醉倒玉人扶銀燈揭莫問舊日江山
幾多離別却憶錦帆游迷宮闕回首故苑繁華豪氣五
陵都銷滅斷柳鎖寒烟潮聲咽

感懷

壺中天慢

年少疎狂擬晞髮扶桑濯纓暘谷北適幽燕東適楚爭

道中原逐鹿抗節登車悲歌倚劍太華青如粟聞雞中
夜秦庭曾有人哭誰憶萬里關山塵凝箭羽慷慨嗟
髀肉白髮青衫歸故里多少泥塗之辱却羨淵明休官
彭澤三徑連松菊迎門稚子殘書老硯茅屋

感春

憶秦娥

新桃李無情風雨能銷幾能銷幾一分塵土二分流水
劍光羞澁空頻倚舊游紫塞雲如壘雲如壘壯心零
落鬢絲凝縷

鄱陽五家集卷十四

欽定四庫全書

鄱陽五家集卷十五

鄱陽史簡編

明劉炳春雨軒集四

百哀詩

并序

百哀哀耆舊也予以漂泊之踪去國二十有五載及還桑梓登芝山過魯公亭蔓烟殘照莽其為墟因念平生宦遊江漢以翰墨之技辱契于縉紳賢士間轉盼俯仰多為

鬼錄晨星寥寥風流雲變存者能幾追憶游從之樂或登
高把酒或夜雨燈窓操觚典籍之場咏歌文藝之圃獲
聞所未聞見所未見儼乎容儀會晤之時渺乎交際睽
離之處恍若一夢寧可復得耶其或以節義立身或笑
學致宦或以苦志槩鉛守道林阿或以游藝和光方外
自尚其緒言餘論音微末沫而聲光流洽于時事業
未白于後雅志遂湮良可痛惜白楊蕭蕭宿土
荒矣夕露瀼矣身名俱泯與草木而同腐矣何

時命之不偶耶雖駒隙不留尺波電謝而秋菊春
蘭英華靡絕深懷季子掛劍之感不勝山陽隣笛
之悲昔魏曹文侯痛徐陳應劉數年之間化為鬼
物臨文投淚良有以焉張孟陽賦七哀哀漢陵也
杜工部賦八哀哀大臣也予今不敢以文律追步
前軌而悼亡慨逝古今一情故著於卷并疏其姓
氏梗槩惟知己者覽之必有同予懷者焉不以齒
爵為次隨筆題述其有贈答賡酬因并錄附之

諸公

贈答篇章頗

繁茲不具載

哀曹國李公

諱善長定遠人

威儀重厚武勇有文屢摠戎機出將入相籌謨帷
幄王室股肱真開國之元勳何天之不假年也

封曹國公

蕭何興漢邦李靖佐唐室惟公實英武經濟多密勿紫
微拱紅雲黃道扶赤日安邦稱股肱定國資柱石三年
忝記府龍鍾侍文墨開運真元勳百世期廟食

西平沐公

諱

英定遠人

嶽峻川澄王室心
膺總戎出將安撫蠻夷藩衛邊
陲虎臣良將曳裾幕府不勝哀悼焉
封西平公
桓桓西平公虎臆如鐵色
總戎領貔貅破敵撫蠻貊安
邊鎮藩省匡濟立勲策十年叅幕府
深愧簪纓客
酌酒瞻南雲悽其寸心折

余廷心

諱

關武威人

妙齡高科歷仕中外
既委舒城之寄屢恢戰捷之

功保障江淮孤軍援絕闔門死節忠義冠時哀哉

元贈夏國公

心同比干赤血化莖弘碧嚴於三冬霜烈若九秋日遙
瞻瀟山雲磊嵬千仞壁特筆書姓名忠精貫金石

劉伯溫

諱

基括蒼人

文登虎榜學貫天人承寶運以濟時遂成名於柱
史封誠意伯

括蒼何嶙峋列秀青可數產茲梁棟材文藝沂東魯天

文知識緯承雲遂騰翥不負槐花秋勲名策天府

秦元之

諱原闕號時習平原人

前朝耆舊歷仕省臺治政廉能著聲中外丹心白
髮老淚有焉 元官侍御

銅仙卧荒雲春蚓弔長夜瑤池桃花死冷雨胭脂謝老
淚酸枯腸羈旅哭泣社無風生羽翰酌酒茂陵下

宋景濂

諱

濂金華人

卅角穎悟日誦萬言研究五經該博三教子史百

氏靡不貫通聞大國之皇猷專一代之制作偉哉
官翰林學士

嫫女鍾英靈文燄射斗角九野驚鳳麟孤雲薦鵬鶚丹
袞資黼黻玉策專制作老筆繼班馬道統溯伊洛天不
遺耆年斯文汨雙落

危太璞

諱

素臨川人

妙年翰墨馳譽中朝台輔晚登真瞻國老鼎移宗
社隱忍南歸後死之哀白珪之玷

早歲臺閣英文藝發天藻經邦寄台輔論道資國老手
支扶桑危淚泣崑崙倒翠華氣慘悽紫極色枯槁馮道
晚歸來白髮卧烟島

朱允升

諱原闕

休寧人

蚤膺鄉薦多藝著聞既際風雲登名禁苑 官翰
林學士

黃峯三十六秀色干雲霞哲人結茅屋讀飽書五車乘
時展經濟白日升天槎挂冠仍著述人羨筆生花

胡叔直

諱合真樂平人

寄冠佩於上清登仙名於金闕燿然文藻名著道

山 提舉上清官事

清如巖下梅瘦若松上鶴時聞九臯喚孤響振雲壑仙
籍登玄都文藻通紫閣詩魂不可招荒墳雨苔剥

傅子初

諱貴全德興人

螢囊夜雨鶚薦西風暮年流寓於兵戈每泣瞻天
之老淚 元官府判

柴門對青山茅屋俯流水伊吾夜無眠寒燈墮紅蕊聲
名一朝振車馬動閭里書臺悽暮烟過客猶仰止

董仲可

諱伯羽原闕

人

兩貢進士苦志憂時暮年履運之衰慨以蒙塵之
感自號周遺民焉

董公治安策足展經邦才手扳蟾宮桂足躡龍虎臺鵬
冠簪白髮蝸室生青苔杜陵憂國念伏櫪老龍媒

朱克升

諱公遷樂平人

早膺鄉舉坐擁臯比自兵亂以歸田爰著書而守
道有四書通旨行於世 元山長

秋風折丹桂蟾宮先著鞭獻賦昔有頌著書今尚傳青
燈老半世白髮垂兩肩暮年荷長鉅杞國屢憂天

蘇平仲

諱

衡眉山 人

眉山之裔文鳴於時懷志抱才未展所蘊

眉山文獻源後裔稱傑作垂雲九苞鳳瑞世麟一角乘
運登禁林雄筆振臺閣荒隧誰招魂悲泉咽雲壑

辛好禮

諱

敬大梁人

嗜學好古刻志於詩追駕盛唐時號才子

王風萎蔓草大雅何微茫嗟哉逮梁宋孰能繼虞唐鸞
鳳著文彩雲漢昭天章九原不可作悲風摧棟梁

許栗夫

諱

璵樂平人

文魁鄉薦學貫易經政騫翮於長風何鷗鵬之委
化 官知府

鄱水出龍頭首薦魁虎榜道探伊洛源學泝洙泗講奎

星流紫輝天球振清響弟子何珊珊儒林動瞻仰

練伯尚

諱

高新淦人

古懷雅學欲濟於時書攻八分詩繼大雅驥足萬里未獲展焉官給事中

平生雙眼高偉論橫四海駿驤騰霜蹄翔鸞振文彩詩聲追大雅筆札輕阿買笑語迴春風諸生仰模楷

徐彥亨

諱

品樂平人

苦心簡冊就試有司既調花縣之琴何促玉樓之

召惜哉 官知縣

卅角事經史螢窓同寸陰芸綠蠹簡細草青書帶深予
乘紫塞馬君調花縣琴玉樓何蚤召荒塚閱空林

孫子林

諱

植浙東人

好學嗜古小篆尤精繪事該通時論稱雅高懷自
許慕金丹之旨焉 官左司郎中

清澄玉壺冰迥出玄圃霞高懷振塵表雅度多才華妙
筆倣關董小篆蟠龍蛇每思勾漏令輕舉服丹砂

魯志敏

諱

修樂平人

雅志乎學尤攻於詩屢陳策於轅門欲澄清而匡
世白首哀詠徒屢憂國焉有卧雪軒集 授校官

魯山堆月場苦竹蔭清樾茅屋哦春風衡門卧寒雪高
義磨層空妙句追往哲平生憂國心泣涕屢陳策

蔡思賢

諱

哲興國人

姿度魁偉孝而有文乘景運以匡時抒經綸之遠
畧 官叅政

西山文緒餘丰采驚玉立孤隼雲海高九牛棟梁出經
邦正儀刑匡濟多遠識墨沼波溶溶淋漓洒文筆

蔣師文

諱

易建寧人

學究經史積書滿家早從虞揭之門屢却邱園之
薦聲冠閩土有道南書院之額焉

道南萬書樓文藻冠閩土早從揭文安子史深汲古東
帛貴邱園高卧守環堵便便五經腹皓首心自苦

宋仲珩

諱

璚金華人

淵源家學字義尤精篆楷草書追軌前輩蘭蕙蚤
姜亦命也夫 官中書舍人

淵源盛家學文藝尤精研鐵硯磨臍潤墨沼鵝羣鮮篆
追秦漢轍草繼鍾王筌沙痕螺螭壯鎖鈕蛟龍騫清芬
可永世蘭蕙凋芳年

趙子常

諱

沔歙縣人

潛心經史尤貫春秋常負笈於虞門自養高於林
下

晨樵歛山青暮汲歛水綠閉戶動一紀守道不干祿平生春秋硯疑義如割竹哀哉青城翁心喪三年哭

錢朝陽

諱

旭沔陽人

才學通暢雅懷自高慨匡濟之無成每樂天而自任官知府

荆南多杞梓秀色寒蒼蒼崢嶸具梁棟信矣扶明堂匠石不自遇徒為時感傷淒其歲年晚風雨卧滄江

朱原立

諱

基鄱陽人

篤學潛心名登鄉舉晚遇兵塵之荏苒守志林壑
以自高

門對箕山雲喬木蔭桃李鄰曲誰往還鉛槧塵滿几馬
蹄踏桃花棒檄為親喜古市今蕭條人稱紫陽里

詹同文

諱

同江夏人

多材茂學雅度洒然乘運高騫名登翰苑 官翰
林

神龍戰大野天地生殺機風雲濟玄運志士多乘時翮

翮富文學微垣聲譽馳歸來卧烟島清風吹布衣

劉彥正

諱

爆鄱陽人

多藝好學繪事留心史籀精通潛心師古有篆韻
集鈔行於世

衡門午尚掩籜冠塵懶除探研究亥豕訛舛分魯魚蒼
頡昔何邈陽冰今已無蛟龍蟠鎖紐石鼓悵烟蕪

徐伯推

諱

恕樂平人

閉門窮經屢舉鄉薦獲觀光於上國僅沾祿於下

寮 官縣丞

門多車馬塵林塘花木春行期濟九野豈止榮一身既
承郡邑薦早充觀國賓徒勞州縣苦誰念綈袍貧

端以善

諱原闕 溧水人

丰儀整肅文律兼通鵬奮九秋風摧其翼賁志未
展時論惜焉 官叅政

端木黎陽翁玉色清見骨妙年事功勲讀書仍讀律曠
志在萬里慷慨思攬轡丰儀正朝端懷其為時惜

李仲公

諱

存安仁人

文追漢魏經史該深多藝有才尤通醫術達官屢
舉堅卧自高延譽縉紳前朝耆舊

深山閼喬梓參天經百秋明堂乏匡濟滄江無萬牛塵
生瑤池水雲暝蒼梧丘著書以娛老湯湯長夜愁

劉彥昱

諱

煜鄱陽人

總角頴悟經史該通屢試有司著聲詞賦仗義死
盜士林惜焉予同胞弟也 元官巡檢

總角稱穎悟一讀書五行石經手自寫分隸師中郎賦
題五絃琴落筆衆口揚義旗破山越負母親裹糧誓仇
不共國血淚逼中腸

徐誠中

諱 中樂平人

精貫易經屢登鄉舉兵塵歸老終卧林邱 元校
官

高士多遠裔苦心嘗索居十年一藜床三冬五車書雞
窓曉月曙螢案秋風虛棘圍屢戰捷人羨馬相如

陳伯昂

諱原闕 弋陽人

志氣倜儻好學通時經濟未杼霜蹄遽蹶 官知

府

元龍湖海士志節何崔嵬欲將三寸舌掉臂黃金臺赤
霄扶浮雲振鬣鳴龍媒鼓車起六轡慨矣霜蹄摧

湯思敬

諱原闕 浮梁人

平生之志宣事溫飽一官而逝亦命也夫 官知

縣

湖田飛白鷺林樹鳴黃鸝草堂晴讀書終朝懷自怡志
豈在溫飽惜哉時命違折腰辭斗米元亮老東籬

劉子高

諱

崧廬陵人

學富才優識論自許苦吟鍛鍊追駕盛唐西土之
英也 官職方郎中

匡衡昔攻書繼晷鑿鄰壁短燭凝隙光流輝映綳帙苦
力追正音漢魏深祖述落筆人爭傳文聲重千鎰

許克敬

諱

原闕

樂平人

刻苦窮經高論不讓匡時之志捫虱聞雞食祿下
寮何命不偶 官縣丞

少年讀書狂失意輒叫罵憂時捫虱談志在靖天下沾
祿纔下寮案牘食不暇伏櫪懷長纓驂騑氣凋謝

高季迪

諱

啓姑蘓人

志學不倦苦耽於吟芳譽流英吳士之秀

闔閭門前樹烏啼華月圓詩吟綺樓上午鼓未成眠翠
袖添琬鴨烏絲寫粉箋每懷經濟念鸞鏡感芳年

吳主一

諱志淳豫章人

多藝師古篆隸精研詩造往賢士林延譽

朝挹西山翠暮招南浦雲心胸貯沆瀣珠璣播奇芬銀
牋寫章草鐵筆攻八分苦心追往駕驄馬五花文

錢本初

諱

塘沔陽人

自幼聰悟好習詩書筆札翩翩稍精繪事咸以千
里之駒期之亦荆南之秀也官給事中

錢郎千里駒自擬空北冀筆翻秋濤狂杯放春歌醉風

摧青桂凋霜隕紅蘭悴落日望荆南心傷墮危涕

杞楚材

諱似杞鄱陽人

寄跡緇流不縛禪律涉獵書史詩思尤工

杞老緇衣流膚碩眼雙碧雲翮鷹絆韝霜蹄驥縻櫪學
欲排詞林身不縛禪寂悽其一龕燈絮淡掛塵壁

方方壺

諱從義上清人

蚤游燕京寄跡外史文學繪事延譽翰林清致古

心流英湖海號金門羽客真人提宮事

蓬萊五雲宮金粉飾椒壁醉時卧瓊瑜酒醒洒墨汁傲
世雙眼高鬼谷白雲濕玉堂寄書來落月夢相憶野鶴
弔孤松衰螢照荒隧

王有成

諱

彊鄱陽人

早肄舉業莫利有司詩宗初唐不尚浮靡克名玉
署未展所懷官修撰

城南清虛堂偉矣珊瑚噐窻深寒雞早囊古秋螢悴簪
筆侍玉墀趨班掌金匱淪落傷遺文虹光斗牛避

周白士

諱原闕 上清人

寄跡方外清節自高詩律精深追宗韓孟韜光養
素不炫時名號壁魯神生

陰洞懸乳泉石沁古苔峭紺粉落秋紅芙蓉澹斜照孤
吟白日晚疊嶂玄猿叫高懷誰與儔天風遞長嘯

陶主敬

諱安姑孰人

早步蟾宮通才遠識既濟新邦之運自期開國之
功赴召玉樓竟虛黃閣惜哉 官叅政

早躋龍虎臺未足展雲翮
匡時濟經綸逢運振雄策
檄迴星斗芒劍動風雲色
未杼稽古心每惜蕭曹劃

陳養吾

諱

浩揚州人

丰儀蘊藉詞翰瑰奇手扳丹桂於秋風歌倚珠簾
於明月詠諧几席所謂揚州少年焉官按察

少年不下帷壯志期射策秋闈擢西風春衫試南陌歌
餘豈惹紅醉倚瓊花白非無經邦才自媿齊門瑟

俞用中

諱希魯京口人

都邑交薦聲華著聞屢主文衡考試三省門牆桃李藥籠參苓接踵有焉

棘闈肅儀鸞槐影通九陌戰餘萬蟻酣氣奪千軍魄金蓮月三更彩筆日五色南豐一瓣香桃李遍南北

黃淳齋

諱李倫鄱陽人

妙齡筆札史局騰英捧檄南歸養素林下託詩寄興禮佛清齋將希志於遠公繼宗於蓮社歟元

校官

折節委榮寵，顛將生死齊。
秋荷補壞衲，空林旅幽棲。
懸燈禮綉佛，清齋烹露葵。
虎溪流古月，自與遠公期。

王又新

諱有壬京口人

味道窮經罕，交流俗閉門。
晦跡苦節清，高富貴不累於心。
高尚自全其節。

窮經不窺園，閉戶動一紀。
渴不飲盜泉，飢或借鄰米。
學探伊洛源，志遡洙泗。
委苦節，貧自甘。清風振閭里。

周伯寧

諱 滇江表人

詩律清競時號才子士林延賞西社之俊也官

尚書

大音何寥寥制作思述古藻思追大歷流英繼才子青
海文魚翔赤岸天雞舞靈槎汴天河傷心睇遙浦

藍靜之明之昆季

諱原闕崇安人

清碧杜先生隱居武陵前朝以處士聘不起藍氏
昆季其門生也文翰英美青出於藍靜之隱處明
之官至按察

徵君天下名書藏武陵曲金澗青出藍丹田白生玉棠
棣馳英聲芝蘭播清馥桂林持節還高風振林谷

蔡淵仲

諱

深樂平人

春秋老硯世守青氈雖鶚薦於秋闈未鵬搏於霄
漢佐憲綱於饒信激忠義以匡時歸卧林泉竟以
疾卒 元山長辟憲掾

平生清苦心不負春秋筆看花上林苑走馬長安日裴
公平淮西韓愈佐軍律歸來披短褐高卧書一室絮酒

向長風悽其淚沾臆

章復齋

諱

復鄱陽人

早去鄉閭游宦藩省既抒經濟歷郡剖符投老歸
與藻翰自樂官州守

兵塵辭里閭游宦歷藩府乘運振雲鱗歷郡剖符虎扁
舟載琴丹衣錦照桑梓日以文翰娛耆年傲林圃

李燦然

諱

原闕

樂平人

文振初科早登龍榜詞林典則屢主文衡桃李門

墻何蔚如也 元官待制

書將五車讀少年觀國光龍池五色綠官驛槐花黃賜
衣照春色淡墨題秋香林塘遺故宅猶指鄭公鄉

王子克

諱

禕義烏人

習業黃公之門馳文游水之右兼通吏事修史禁
林縉紳之英也 官給事中

嗚呼太極翁妙手稱浙右弟子何班班經史皆指授炳
如鸞鳳翔蔚若杞梓秀作者今已無斯文嘒耆舊

楊廉夫

諱維楨會稽人

妙年銳氣獻策丹墀筆陣翔於士林詞源振於文
海游翰風月才致流離焉 元官推官

早持五色筆文芒射奎星龍墀曉射策雁塔春題名才
華擅風騷筆陣驚老成宦游多使酒銀燭照娉婷

周伯溫

諱伯琦都陽人

早歷臺省文藻燦然篆隸精深流聲中外暮年流
寓於南國傷心莫致其忠愛焉 元官左丞

簪纓著江右早負臺閣英嶺海持憲節中朝播文聲篆
法攻史籀古勁追陽冰歸來老鄉國荒隧照秋螢

操公琰

諱

琬樂平人

平生一硯通貫五經時號書櫃問無不答幸晚扳
於丹桂終擁席於冷官所蘊無施士林多慨 元

官學錄

一燈清苦心縱橫五經庫龍門屢點額晚獻長楊賦莫
年擁臯比未足鳴韶濩旅櫬門生扶風悲白楊路

劉潤芳

諱

潤都陽人

性度高爽好吟善醫樽俎詠諧交游多致

劉翁罷修頤洒洒多蘊藉陶情樂三餘賣藥不二價詩
章每吟哦談讌佐樽斝風致今已無苔荒斷碑鏤

程邦民

諱國儒德興人

丰儀肅整精博詩經一舉高騫在官多政千里之
翮中道傷焉官知府

亭亭鹿坡山孕秀生鳳凰凌風振羽翮五采皆文章一

鳴歛來儀飛入天門翔期以萬里遠惜哉中道傷

許德夫

諱

瑤樂平人

研史覃經屢試不利邑徵郡薦高蹈邱園自甘抱
道而居不勝履運之慨悲夫

窺書不窺園志在圖不朽寒窻老青氈雲壑甘白首束
帛屢交徵美玉豈輕售守道嗟無成傷茲淚如溜

顧利賓

諱

觀京口人

侍宦浙右尤工於詩早年登松雪公之門暮歲患

左邱明之疾於世未用良可惜也

青年從宦游秀句稱獨步
蘭茝發春風芙蓉沐朝露
昔追松雪翁逸駕遵廣路
悵矣桑榆情看花眼如霧

董宗文

諱

彛樂平人

易經精貫三捷秋闈士林仰之泰山北斗憐合抱
之杞梓傷未盡其用焉 官博士

連山及龜藏該博貫諸傳
鶚薦喜三捷蟻酣經百戰
策獻黃金墀酒侍瓊林宴
杞梓成摧殘斯文淚如綫

葉楚庭

諱

蘭鄱陽人

從宦於浙頗擅風騷以酒托懷詩律清緻厭世紛
之轆轤寧捉月以自逝焉號醉漁

舡頭酒百壺舡尾書百冊閒騎桃花馬醉弄西湖月狂
吟捲秋濤聲撼扶桑折滄海無還期哀魂楚雲結

楊遵道

諱

遵浦城人

翰林之裔博古探奇篆隸該通繪事精緻器虛瑚
璉士林惜之官知府

聯鑣白下門載酒丹陽郭素紈寫黃筌墨沼臨碧落遠
追秦漢宗近倣荆闕作華表樹參差悵望歸來鶴

徐叔度

諱矩德興人

潛心篆隸致力詞章白眼自高每慎許可衡門寡
接志尚古人官知縣

徐卿志瑰奇苦學務師古雄文軼先輩筆排咀楚深
村風雅叅力欲造化補辭官歸敝廬蓬蒿守環堵

蔣貴和

諱惠都陽人

乘運致身留心文學官能廉幹於律精明自任鉤
深物少容恕

年年志詩書於律獨精熟守官著廉能刻苦拯頽俗歸
來半畝園種此三徑竹對客無酒錢塵釜少儲粟空遺
舊交徒長哀酌醺醪

吳用晦

諱原闕 鄱陽人

灣月如昨故澤猶在健翮風摧文藻增慨其祖月

灣先生也 郡訓導

滄灣俯空寒老月懸古色殘花漂斷沼野徑繞荒宅王
珣稱短簿牙笏猶故澤文藻遺江山蒼茫暮烟隔



鄱陽五家集卷十五